



Groupe parlementaire

Här Claude Wiseler
President vun der Deputéierte Chamber
19, um Krautmaart
L-1728 Lëtzebuerg

Lëtzebuerg, den 29. November 2023

Här President,

esou wéi d'Chambersreglement et virgesäit, bieden echlech, dës parlamentaresch Fro un d'Madamm Gesondheitsminister a sozial Sécherheet weiderzeleeden.

An der Pressekonferenz vum 1. September 2021 huet d'Regierung deklaréiert, dass d'Impfung dat bescht Mëttel ass fir eis Matmënschen ze schützen. Et ass gesot ginn, dass eng Impfung net nëmmen zum Eegeschutz, mee och Friemschutz gutt ass. Dës huet en immense politeschen an emotionalen Drock (Solidaritéit) op d'Bevëlkerung ausgeübt fir sech impfen ze loossen. Mir wëssen, dass d'Pharmaindustrie d'Tester fir déi sougenannten „transmission control“ guer net duerchgefëiert huet, an d'Impfstoffer och ausschliisslech eng Autorisatioun am Kontext vun der „personal protection“, dem sougenannten Eegeschutz, haten (cf. Brëif vum 18. Oktober 2023 vun der EMA un d'EU-Parlament). D'Impfstoffer waren also zu kengem Zäitpunkt fir den epidemiologeschen Schutz zougelooos an e Grond fir grouss Impfcampagnë vu gesonde Mënschen gouf et net. Et ass och seele vun Niewewierkunge geschwat ginn op de Pressekonferenzen. Hei wësse mir och mëttlerweil, dass et zu Impf-Niewewierkunge komme kann (874 Resultater bei Pubmed mat der Sich „side effects of covid 19 vaccine“).

An dem Kontext wëilt ech der Regierung dës Froe stellen:

1. Wéi eng Konklusiounen zitt d'Madamm Ministesch fir déi zukünfteg Informatiounspolitik vun der Regierung an dem Zesummenhang?
 - a. Wéi gëtt d'Transparenz vis-à-vis vum Bierger am Krisefall verbessert?
 - b. Wéi gëtt eng besser Kontroll vu wëssenschaftlechen Quellen gemaach?
 - c. Sinn an dem Zesummenhang Prozeduren opgestallt gi fir eng zukünfteg Pandemie?
2. Wéi erkläert d'Regierung, dass si eng riseg Impfcampagne lancéiert huet, obwuel den epidemiologeschen Schutz net getest gi war?
3. Wéi erkläert d'Regierung eng Légitimiséierung vun deem psychologeschen Drock op d'Mënschen sech impfen ze loossen?

4. Ginn et Statistiken oder Rapporten (fir Lëtzebuerg) iwwert d'Niewewierkunge vun der Impfung? Wa jo, wou sinn déi ze fannen? Wann nee, wéi ginn déi Donnéeën erhuewen zu Lëtzebuerg a wéi dono verschafft?
5. Gëtt eng Indemnitéit consideréiert fir entstane gesondheetlech a wirtschaftlech Schied am Zesammenhang mat der Coronaimpfung? Wa jo, wéi soll déi ausgesinn? Wat sinn do d'Prozeduren? Wéi gëtt d'Héicht vun der Indemnitéit evaluéiert?
6. Gëtt et ëmmer nach eng Impfflicht fir d'Coronaimpfung bei der Lëtzebuerger Armée? Wa jo, a mat allem Wëssen dat mir haut hunn, muss déi Impfflicht net ofgeschaaft ginn?

Mat déiwem Respekt,



Alexandra Schoos
Deputéiert



LE GOUVERNEMENT
DU GRAND-DUCHÉ DE LUXEMBOURG
Ministère de la Santé
et de la Sécurité sociale

Gemeinsam Äntwert vun der Madamm Ministesch fir Gesondheet a sozial Sécherheet an der Madamm Ministesch fir Verdeedegung op d'parlamentaresch Fro n° 68 vum 29. November 2023 vun der honorabeler Deputéiert Madamm Alexandra Schoos.

Et ass korrekt, dass d'Europäesch Medikamenten Agence (EMA) hire positiven Avis fir d'Zouloossung vun de Covid-19 Impfstoffer ëmmer op de Schutz vun der geimpfter Persoun baséiert. E Medikament (an deemno och e Vaccin) gëtt primär dorop évaluéiert wat fir e Benefice et fir d'Persoun selwer bréngt. Dëst schléisst awer op kee Fall aus, dass et doriwwer eraus ee weidere Benefice fir d'Bevëlkerung gëtt (de sougenannten epidemiologesche Schutz).

Et ass falsch ze behaupten, dass dësen epidemiologesche Schutz net nogewise ginn ass. Et gi méttlerweil eng ganz Rei vu wëssenschaftlechen Etüdenⁱ déi kloer beweisen dass et dëse Schutz gëtt, an et besteet keen Zweifel drun, dass dëst och zur Kontroll vun der Pandemie bäigedroen huet.

Et ass och initial erwaart ginn, dass dësen Effekt länger géif unhalen. Dëst ass awer leider net de Fall: mir wëssen haut, dass och wann den individuelle Schutz géint schwéier Krankheetsverleef an Doud länger unhält, an nëmme lues iwwert d'Zäit noléisst, dëst net de Fall ass fir de Schutz géint d'Infektioun an domat de Risk de Virus weider z'iwwerdreen, déi béid relativ schnell zrëck ginnⁱⁱ. Well mir dëse Fakt mam Wësse vun haut verstinn, mécht et och elo, besonnesch an der Situatioun vun enger wéineg pathogener Virusvariant, kee Sënn méi systematesch déi ganz Populatioun ze impfen, mee et gëtt weider recommandéiert vulnerabel an eeler Leit ze impfen, déi jo een héije Risk fir Komplikatiounen vum Covid-19 hunn. Leschten Informatiounen no, gesäit et awer esou aus wéi wann d'Impfung och de Risiko vu Long-Covid géif erofsetzen.

Wat eng zukünfteg Informatiounspolitik bei enger nächster Gesondheetskris betrëfft, huet een aus der Covid-Pandemie geléiert, dass d'Wëssen ëm eng nei Krankheit sech progressiv iwwert d'Zäit opbaut, an dass d'Informatiounen déi un d'Populatioun iwwermëttelt ginn, nëmme déi kënne sinn déi zu engem bestëmmten Zäitpunkt disponibel sinn. Réckbléckend weess een natierlech ëmmer méi, mee zum Zäitpunkt wou déi generell Impfcampagne lancéiert gouf hat Lëtzebuerg et nach mat méi pathogene Virusvarianten ze dinn, an et gouf déi berechtegt Erwaardung, dass d'Impfung, nieft dem direkten Effekt fir déi individuell Persounen, och e längeren Effekt op d'Iwwerdroung kéint hunn. An deem Sënn kann een net soen, dass während der Pandemie net transparent kommunizéiert gi wier, oder wëssenschaftlech Quellen – déi deemools disponibel waren – net gepréift gi wieren.

Wat d'Evaluatioun vu wëssenschaftleche Quelle betrëfft huet d'Regierung an den ëffentlechen Administratiounen eng Rei Leit mat der néideger Kompetenz fir esou Publikatiounen kritesch ze hannerfroen a kann och – wéi dëst während der Covid-Kris regelméisseg geschitt ass – op d'Kompetenze vun der Uni Lëtzebuerg, dem Laboratoire national de santé, an den ëffentlechen Fuerschungszentren (LIH, LIST, LISER) zeréckgräifen.

Während der Impfcampagne gouf och kee psychologeschen Drock op d'Mënsche gemaach, mee nëmme déi Informatiounen kommunizéiert, déi zu deem Zäitpunkt disponibel waren.

Wat d'Froen iwwert d'Niewewierkunge vun der Impfung an d'Indemnitéiten, an déi betreffend Prozeduren betrëfft, verweisen ech d'honorabel Deputéiert op déi ganz detailléiert Äntwerten vun der deemoleger Gesondheetsministesch op d'parlamentaresch Froen Nummer 7844 (30. Mäerz 2023) an 8046 (31. Mee 2023) vun den Häre Jeff Engelen a Fernand Kartheiser. Et ginn zu dëse Punkte keng nei Elementer.



Betreffend der Fro vun der Covid-Impfflicht bei der Arméi ass et esou dat d'Arméi weiderhin eng Impfflicht géint Covid-19 an hiren Opnamebedéngunge fir zum Militärdéngscht zougelooss ze ginn huet. Dës Impfflicht huet sech bewäert, well d'Arméi esou Infektiounsketten ënnerbannen a schwéier Krankheetsverleef verhënnere konnt. Effektiv gouf et keng schwéier Krankheetsverleef opgrond vun Covid-19 beim militäresche Personal an d'Arméi war esou no der Aféierung vun der Impfflicht mat kengen operationelle Beanträchtege konfrontéiert.

D'Impfflicht bleift weiderhin aktuell am Kontext vun der Bedeelegung vun der Lëtzebuenger Arméi un internationale Missiounen am Ausland, wou d'Partnerarméien, notamment d'Belsch, Däitschland a Frankräich, an déi d'lëtzebuergesch Detachementer integréiert sinn, weiderhin eng Impfflicht hunn. En fonction vun der Aschätzung vun der sanitärer Lag an de Missiounsgebieder an der Praxis vun de Partnerarméien, kann d'Impfflicht zu all Moment nei évaluéiert ginn.

Lëtzebuerg, den 27. Dezember 2023

D'Ministesch fir Gesondheet
a sozial Sécherheet
(s.) Martine DEPREZ

ⁱ E puer Referenzen als Beispiller: 1. Effect of vaccination on household transmission of SARS-CoV-2 in England. RJ Harris et al. N Engl J Med 2021;385(8):759-760. 2. Effect of vaccination on transmission of SARS-CoV-2. ASV Shah et al. N Engl J Med 2021;385:1718-20. 3. The indirect effect of an RNA-based COVID-19 vaccination of healthcare workers' unvaccinated household members. J. Salo et al. Nature Communications 2022, 13, 1162. 4. Effect of vaccination on household transmission of SARS-CoV-2 Delta variant of concern. FP Lyngse et al. Nature Communications 2022, 13, 3764.

ⁱⁱ Och hei zwou Referenzen, als Beispill vu villen: 1. Duration of effectiveness of vaccines against SARS-CoV-2 infection and Covid-19 disease: results of a systematic review and meta-regression. DR Feikin et al. Lancet 2022;399(10328):924-44. 2. Association between Covid-19 vaccination status, time elapsed since last vaccine dose, morbidity, and absenteeism among health care personnel: a prospective, multicenter study. HC Maltezou et al. Vaccine 2022;40(52):7660-66.